

CARTA DE IS BALORIS – SCEBERAU 1

ISTATUDU DE SU SOTZIU SARDINNIA PODERABILI E SOBERANA

Is sardus liberus e soberanos in terra de Sardinnia decrarant e s'impinnant a stabilessi, cun s'esercitziu de is forzas de is sotzius, curturalis, comunicativas e cun is leis accapiadas a su mandatu de is eletzionis, s'affirmatzioni coerenti de is principius de baloris chi s'ghint:

Su balori de s'autodeterminatzioni de is populus est s'elementu de lei e politicu nou de s'Istatudu de Soberania de sa Sardinnia, poita ca donnia arrelata sotziali aintru ominis e feminas e aintru issus e is istituzionis, si depit cunformai a custus precettus.

Su balori de sa paxi, de s'arrespettu de s'atru e de sa seguresa. Sa paxi est s'unica manera de cunfrontu de is ideas, su fundamentu de auba partiri po disennai soluzionis po su beni comunu. Sa Sardinnia e is sardus arrefudant sa gherra e donnia prepotentzia de su forti contras a su debili e disigiant a si presentai a s'accorru de is natzionis cumentu unu istadu neutrali. Sa tolerantzia, s'arrespettu de s'atru, de su singulu e de sa comunidadi, de is populus e de is natzionis insoru, de is curturas, de is morus, de is filosofias e de is arreligionis, de is moris sessualis, funt parti, s'ghendi su principiu de cambiadura, de is fundorius de su sistema de seguresa e de amparu de is interessus sintzillus de su populu sardu chi olleus tenni a fundoriu nostu.

Su balori de s'unidadi de su populu sardu. Tottus is sardus chi bivint aintru de is lacanas de s'isula o chi bivant a foras funt parti de su populu sardu. Su populu sardu est su meri unicu de sa soberania e, inzandus, mardu e organu nadiu costitutzionali e, po custu, respingidori de sa vida politica de Sardinnia. S'esercitziu de soberania tenit consecuentzas in donnia banda giuridica, privada e pubrica. Is singulas arretzas politicas e amministrativas funt articolatzionis postas a su serbitziu de su populu, de custu arreconnottas, e grazias a custas su populu ponit in fattu – cun d'unu sistema de rappresentanzia stamentaria e democratica – sa soberania cosa sua.

Su balori de su traballu e de su deretu a una vida dinnia e prexada. Is sardus liberus e soberanus gherrant de manera chi is fillas e is fillus de Sardinnia tengant unu traballu e potzant biviri un vida dinnia in s'isula insoru. Donnia sardu tenit deretu de manigiai cun profetu is propias energias, po s'isviluppu de sa personalidadi propia e po arriciri is tentas propias, candu issas funt cumpatibilis cun su beni de sa comunidadi. Donnia sardu tenit deretu a una domu e tenit deretu a pesai unu progetu de vida. Po nci arrennesci, tocat a favoressi s'intrada de donniunu in su mundu de su traballu e a garentiri, in custa banda, paridadi aintru omini e femina, protezioni po sa maladia e s'angraidentzia, unu agiudu totali po su chi pertocat is casus de non abbastu. Est de profetu poi is sardus de scummiti in is giovunus, e de scummitti in s'ammaniamentu, de numeru puru, de su populu sardu, poita una sociedadi chi imbecciat est ponendu issa 'e totu in su tretu de sa morti. Su manigiu atentu e profetosu de su dinai pubricu, su partziri con un egualidadi sa richesa cun sa fiscalia e is tassas progressivas e amparadas funt is conditzionis concreats po fai de manera chi cussus deretus esistant diaderus.

Su balori de sa lingua sarda, poita s'isviluppu de s'identidadi propia no est possibili chentza donai su balori giustu a sa lingua propia.

Su balori de sa connoscientzia, poita nisciunu progressu, de su singulu o sotziali, est possibili in su scuriu de s'ignorantzia. Po custa arrexoni, promovi sa connoscientzia in donnia logu de su sabiori de sa tennica est una manera primaria de s'atzioni de su governu.

Su balori de sa produzioni curturali identitaria, cun sa tutela e sa promotzioni de sa produzioni curturali identitaria, artistica, literaria, musicali e de is morus.

Su balori de sa produzioni materiali identitaria, cun sa tutela e sa promotzioni de sa produzioni materiali, chi oi est sa banda primaria (messaria, pastoria, pisca, isviluppu de is biddas), de sa piticca e media sienda alimentari e de s'artesanau e de sa banda tertziaria avanzada, e de tottus is attividadis economicas chi faint e su sabiori de fai is abilis in is terras, cun liongius a sa balorisadura poderabili de is addonus localis. S'erenzia de is industrias e de is minas foras de attividadi funt unu addonu importanti, de cambiai de manera poderabili, e ddas depeus usai imparis cun su sanamentu de is terras maladies.

Su balori de s'ambiente e de s'apoderamentu. Is sardus liberus e soberanus creint chi sa terra siat de cunservai e chi dda depeus usai de manera poderabili. S'omini depit bivi arrespetendi s'ambienti: ddu depit ammellorai, no ddu deppit sdorrobai. Depeus torrai, a cussus chi benint pustis de nosu, sa terra innida, limpia, saliosa. Pensaus chi siat giustu aggiudai siendas chi siant s'arresurtau naturali de is regionis e de is biddas, cun attividadis pagu malas po s'ambienti. Seus contra attividadis chi benint de foras e chi funt foras de su controllu de su populu, chi funt allenas de sa vocazioni cosa nosta de produci, e de sa vocatzionis de is regionis, e tenint effettus mannus a pitzus de s'ambienti. Su padenti, is acuas internas, is maris, is tancas chi si podint messai, sa pastura, is prajas, funt benis chi s'omini depit usai non po ddus distrui, a su contrariu deppint essi usaus cun arregula a abilesa e de manera poderabili. Chini difendit sa terra insoru difendit sa richesa de tottus.

Su balori de sa comunidadi e de is comunidadis, de su fai imparis e de su pratziri. Nosu olleus donai balori a sa comunidadi donendi balori a s'isviluppu sotziali e economicu de s'isula, chentza ponni a parti is comunidadis pitticcas e is regionis traditzionalis, chi imparis formant su sistema, postu a paris, de sa comunidadi sarda, e de tottus is feminas e is mascus chi bivint in Sardinnia.